

四庫全書

集部

欽定四庫全書

集部

石倉歷代詩選卷三十六

詳校官庶吉士臣范逢恩

侍讀臣孫球覆勘

總校官進士臣朱 鈐

校對官編修臣盛惇崇

謄錄監生臣史復瑄

欽定四庫全書

石倉歷代詩選卷三十六

明 曹學佺 編

盛唐五

王縉

字夏卿河中人與兄維早以文翰著名

古離別

下階欲離別相對映蘭叢含辭未及吐淚落叢蘭中高  
堂靜秋日羅衣飄暮風誰能待明月迴首見牀空

送孫秀才

帝城風日好，況復建平家。  
玉枕雙紋簟，金盤五色瓜。  
山中無魯酒，山下飯胡麻。  
莫厭田家苦，歸期遠復賒。

同王昌齡裴迪遊青龍寺曇壁上人兄院集和  
兄維

林中空寂舍，階下終南山。  
高卧一牀地，迴看六合間。  
浮雲幾處滅，飛鳥何時還。  
問義天人接，無心世界閒。  
誰知大隱者，兄弟自追攀。

遊悟真寺

王維集亦載此首按紀事作緡詩是必誤入維集今並存之

聞道黃金地仍開白玉田  
擲山移巨石呪嶺出飛泉  
猛虎同三徑愁猿學四禪  
買香然綠桂乞火踏紅蓮  
草色搖霞上松聲泛月邊  
山河窮百二世界接三千  
梵宇聊憑視王城遂渺然  
灞陵纔出樹渭水欲連天  
遠縣分朱郭孤村起白煙  
望雲思聖主披霧憶羣賢  
薄宦慚尸素終身擬尚玄  
誰知草菴客曾和柏梁篇

別輞川別業

山月曉仍在林風涼不絕殷勤如有情惆悵令人別

與盧員外象過崔處士興宗林亭

身名不問十年餘老大誰能更讀書林中獨酌隣家酒  
門外時聞長者車

九日作

莫將邊地比京都八月嚴霜草已枯今日登高樽酒裏  
不知能有菊花無

裴迪

與王維崔興宗俱居  
終南後為蜀州刺史

青龍寺曇壁上人院集

靈境信為絕法堂出塵氛自然成高致向下看浮雲迤  
邐峯岫列參差間井分林端遠堞見風末疎鐘聞吾師  
久禪寂在世超人羣

遊感化寺曇興上人山院

不遠灞陵邊安居向十年入門穿竹徑留客聽山泉鳥  
嘯深村裏心閒落照前浮名竟何益從此願棲禪

夏日過青龍寺謁操禪師

安禪一室內左右竹亭幽有法知不染無言誰敢酬  
鳥飛爭向夕蟬噪已先秋煩暑自茲適清涼何所求

西塔寺陸羽茶泉

竟陵西塔寺蹤跡尚空虛不獨支公住曾經陸羽居  
草堂荒產蛤茶井冷生魚一汲清冷水高風味有餘

春日與王右丞過新昌里訪呂逸人不至

恨不逢君出荷蓑青松白屋更無他陶令五男曾不有  
蔣生三逕枉相過芙蓉曲沼春流滿薜荔成帷晚靄多



聞說桃源好迷客不如高卧晒庭柯

輞川集

孟城坳

結廬古城下時登古城上古城非疇昔今人自來往

華子岡

落日松風起還家草露晞雲光侵履跡山翠濕人衣

斤竹嶺

明流紆且直綠篠密復深一徑通山路行歌望舊岑

鹿柴

日夕見寒山便為獨往客不知深林事但有磨麋跡

木蘭柴

蒼蒼落日時鳥聲亂溪水綠谿路轉深幽興何時已

茱萸泝

飄香亂椒桂布葉間檀欒雲日雖迴照森沉猶自寒

宮槐陌

門前宮槐陌是向歌湖道秋來山雨多落葉無人掃

臨湖亭

當軒彌滉漾孤月正徘徊  
谷雨猿聲發風傳入戶來

南垞

孤舟信一泊南垞湖水岸  
落日下崦嵫清波殊淼漫

敬湖

空濶湖水廣清瑩天色同  
艤舟一長嘯四面來清風

柳浪

映池同一色逐浪散如絲  
結陰既得地何謝陶家時

樂家瀨

瀨聲喧極浦沿涉向南津汎汎鷗鳬渡時時欲近人

金屑泉

縈停澹不流金碧如可拾迎晨含素華獨往事朝汲

白石灘

跂石復臨水弄波情未極日下川上寒浮雲澹無色

北垞

南山北垞下結宇臨歌湖每欲采樵去扁舟出菰蒲

竹里館

來過竹里館日與道相親出入惟山鳥幽深無世人

辛夷塢

綠堤春草合王孫自留翫況有辛夷花色與芙蓉亂

輞口遇雨憶終南山因獻王維

積雨晦空曲平沙滅浮彩輞水去悠悠南山復何在

崔興宗

與王維裴迪俱居終南後為右補闕

留別王維

駐馬欲分襟清寒御溝上前山景氣佳獨往還惆悵

苑咸

成都人

送大理正攝御史判涼州別駕

天子念西疆咨君去不遑垂銀棘庭印持斧柏臺網雪  
下天山白泉枯塞草黃佇聞河隴外還繼海沂康

酬王維

并序

王員外兄以予嘗學天竺書有戲題見贈然王兄  
當代詩匠又精禪理枉采知音形于雅作輒走筆

以酬焉且久未遷因而嘲及

蓮花梵宇本從天華省仙郎早悟禪三點成伊猶有想  
一觀如幻自忘筌為文已變當時體入用還推間氣賢  
應同羅漢無名欲故作馮唐老歲年

慕容承

攜素饌過王維

行行西陌返駐懣問車公挾轂雙官騎應門五尺僮老  
年如塞北強起離牆東為報壺丘子來人道姓蒙

丘為

嘉興人

尋西山隱者不遇

絕頂一茆茨直下三十里扣關無僮僕窺室惟案几若  
非巾柴車應是釣秋水差池不相見颯俛空仰止草色  
新雨中松聲晚窓裏及茲契幽絕自足蕩心耳雖無賓  
主意頗得清淨理興盡方下山何必待之子

題農夫廬舍

東風何時至已綠湖上山湖上春既早田家日不閒溝



塍流水處耒耜平蕪間薄暮飯牛罷歸來還閉關

泛若耶溪

結廬若耶裏左右若耶水無日不釣魚有時向城市谿  
中水流急渡口水流寬每得樵風便往來殊不難一川  
草長綠四時那得辨短褐衣妻兒餘糧及雞犬日暮烏  
雀稀穉子呼牛歸住處無隣里柴門獨掩扉

湖中寄王侍御

日日湖水上好登湖上樓終年不向郭過午始梳頭嘗

自愛杯酒得無相獻酬  
小僮能膾鯉少妾事蓮舟  
每有南浦信仍期後月遊  
方春轉搖蕩孤興時淹留  
驄馬真傲吏翛然無所求  
晨趨玉階下心許滄江流  
少別如昨日何言經數秋  
應知方外事獨往非悠悠

尋廬山崔徵君

日高雞犬靜門掩向寒塘  
夜竹深茅宇秋亭冷石牀  
住山年已遠服藥壽偏長  
虛棄浮生者相逢益自傷

登潤州城

天末江城晚登臨客望迷春潮平島嶼殘雨隔虹蜺鳥  
與孤帆遠煙和獨樹低鄉山何處是目斷廣陵西

送閻校書之越

南入剡中路草雲應轉微湖邊好花照山口細泉飛此  
地饒古跡世人多忘歸經年松雪在永日世情稀芸閣  
應相望芳時不可違

左掖梨花

冷艷全欺雪餘春乍入衣春風且莫定吹向玉階飛

石倉歷代詩選卷三十六

欽定四庫全書

石倉歷代詩選卷三十七

明 曹學佺 編

盛唐六

孟浩然

字浩然  
襄陽人

登江中孤嶼贈白雲先生王迥

悠悠清江水水落沙嶼出迴潭石下深綠篠岸傍密鮫  
人潛不見漁父歌自逸憶與君別時泛舟如昨日夕陽

開返照中坐興非一南望鹿門山歸來恨如失

晚春卧病寄張八

南陌春將晚北窓猶卧病林園久不遊草木一何盛狹  
逕花障迷閒庭竹掃淨翠羽戲蘭苔頰鱗動荷柄念我  
平生好江鄉遠從政雲山阻夢思衾枕勞歌詠歌詠復  
何為同心恨別離世途皆自媚流俗寡相知賈誼才空  
逸安仁鬢欲絲遙情每東注奔晷復西馳常恐填溝壑  
無由振羽儀窮通若有命欲向論中推

秋登蘭山寄張五

北山白雲裏隱者自怡悅相望試登高心飛逐鳥滅愁  
因薄暮起興是清境發時見歸村人沙行渡頭歇天邊  
樹若薺江畔舟如月何當載酒來共醉重陽節

入峽寄弟

吾昔與爾輩讀書常閉門未嘗冒湍險豈顧垂堂言自  
此歷江湖辛勤難具論往來行旅弊開鑿禹功存壁立  
千巖峻深流萬壑奔我來凡幾宿無夕不聞猿浦上搖

歸戀舟中失夢魂  
淚沾明月峽心斷  
脊鴿原離濶星難  
聚秋深露已繁  
因君下南楚書此  
示鄉園

湖中旅泊寄閭九司戶防

桂水通百越扁舟期曉發  
荆雲蔽三巴夕望不見家  
裏王夢行雨才子謫長沙  
長沙饒瘴癘胡為苦留滯  
久別思歎顏承歡懷接袂  
接袂杳無由徒增旅泊愁  
清猿不可聽沿月下湘流

題雲門山寄越府包戶曹徐起居



我行適諸越夢寐懷所歡久負獨往願今來恣遊盤  
台嶺踐磴石耶溪泝林湍捨舟入香界登閣憩旃檀晴山  
秦望近春水鏡湖寬遠懷佇應接卑位徒勞安白雲日  
夕滯滄海去來觀故國眇天末良朋在朝端遲爾同攜  
手何時方挂冠

還山貽湛法師

幼聞無生理常欲觀此身心跡罕兼遂嶮崎多在塵晚  
途歸舊壑偶與支公隣導以微妙法結為清淨因煩惱

業頓捨山林情轉殷朝來問疑義夕話得清真墨妙稱  
古絕詞華驚世人禪房閑虛靜花藥連冬春平石藉琴  
硯落泉灑衣巾欲知冥滅意朝夕海鷗馴

夏日南亭懷辛大

山光忽西落池月漸東上散髮乘夕涼開軒卧閒敞荷  
風送香氣竹露滴清響欲取鳴琴彈恨無知音賞感此  
懷故人中宵勞夢想

宿天台桐柏觀

海行信風帆夕宿逗雲島緬尋滄洲趣近愛赤城好捫  
蘿亦踐苔輟棹恣探討息陰憇桐柏采秀弄芝草鶴唳  
清露垂雞鳴信潮早願言解纓紱從此無煩惱高步凌  
四明玄蹤得三老紛吾遠遊意學彼長生道日夕望三  
山雲濤空浩浩

題終南翠微寺空上人房

翠微終南裏雨後宜返照閉關久沈冥杖策一登眺遂  
造幽人室始知靜者妙儒道雖異門雲林頗同調兩心

相喜得畢景共談笑  
暝還高窓眠時見遠山燒  
緬懷赤城標更憶臨海嶠  
風泉有清音何必蘇門嘯

初春漢中漾舟

羊公峴山下神女漢臯曲  
雪罷冰復開春潭千丈綠  
輕舟恣來往探翫無厭足  
波影搖妓釵沙光逐人目  
傾杯魚鳥醉聯句鶯花續  
良會難再逢日入須秉燭

彭蠡湖中望廬山

太虛生月暈舟子知天風  
挂席候明發渺漫平湖中  
中

流見匡阜勢壓九江雄點點容霽色崢嶸當曉空香爐  
初上日瀑布噴成虹久欲追尚子況茲懷遠公我來限  
于役未暇息微躬淮海遙將半星霜歲欲窮寄言巖栖  
者畢趣當來同

登鹿門山

清曉因興來乘流越江峴沙禽近方識浦樹遙莫辨漸  
至鹿門山山明翠微淺巖潭多屈曲舟楫屢迴轉昔聞  
龐德公采藥遂不返金澗餌芝朮石牀卧苔蘚紛吾感

耆舊結纜事攀踐隱迹今尚存高風邈已遠白雲何時  
去丹桂空偃蹇探討意未窮迴艇夕陽晚

遊明禪師西山蘭若

西山多奇狀秀出倚前楹停午收彩翠夕陽照分明吾  
師住其下禪坐證無生結廬就嵌窟剪苔通往行談空  
對樵叟授法與山精日暮方辭去田園歸冶城

登望楚山最高頂

山水觀形勝襄陽美會稽最高唯望楚曾未一攀躋石

壁疑削成衆山比全低  
晴明試登陟目極無端倪  
雲夢掌中小武陵花處迷  
暝還歸騎下蘿月映深谿

疾愈過龍泉寺精舍呈易業二公

停午聞山鐘起行散愁疾尋林采芝去  
谷轉松翠密傍見精舍開長廊飯僧畢  
石渠流雪水金子耀霜橘竹房思舊遊  
過憇終永日入洞窺石髓傍崖采蜂蜜  
日暮辭遠公虎谿相送出

越中逢天台太乙子

仙穴逢羽人停轡向前拜問余涉風水何處遠行邁登  
陸尋天台順流下吳會茲山夙所尚安得問靈怪上通  
青天高俯臨滄海大雞鳴見日出常覲仙人旆往來赤  
城中逍遙白雲外莓苔異人間瀑布當空界福庭長自  
然華頂舊稱最永此從之遊何當濟所屆

白雲先生王迴見訪

閒歸日無事雲卧晝不起有客款柴扉自云巢居子居  
閒好芝朮采藥來城市家在鹿門山常遊澗澤水手持



白羽扇脚步青芒履聞道鶴書徵臨流還洗耳

早發漁浦潭

東旭早光芒渚禽已驚聒卧聞漁浦口撓聲暗相撥日出氣象分始知江湖濶美人常晏起照影弄流沫飲水畏驚猿祭魚時見獺舟行自無悶況值晴景豁

歲暮海上作

仲尼既云歿余亦浮于海昏見斗柄迴方知歲星改虛舟任所適垂釣非有待為問乘槎人滄洲復誰在

大堤行寄萬七

大堤行樂處車馬相馳突歲歲春草生踏青二三月王  
孫挾珠彈遊女矜羅襪攜手今莫同江花為誰發

宿楊子津寄潤州長山劉隱士

所思在建業欲往大江深日夕望京口煙波愁我心  
馳茅山洞目極楓樹林不見少微星風霜徒夜吟

秋宵月下懷

秋空明月懸光彩露濕驚鵲棲未定飛螢捲簾入庭

槐寒影疎隣杵夜聲急佳期曠何許望望空佇立

將適天台留別臨安李主簿

枳棘君尚棲匏瓜吾豈繫念離當夏首漂泊指炎裔江海非墮遊田園失歸計定山既早發漁浦亦宵濟泛泛隨波瀾行行任艫柁故林日已遠羣木坐成翳羽人在丹丘吾亦從此逝

適越留別譙縣張主簿申屠少府

朝乘汴河流夕次譙縣界幸值西風吹得與故人會君

金公四庫全書  
卷三十七  
學梅福隱余從伯鸞邁別後能相思浮雲在吳會

送從弟邕下第後尋會稽

疾風吹征帆倏爾向空沒千里在俄頃三江坐超忽向  
來共歡娛日夕成楚越落羽更分飛誰能不驚骨

尋香山湛上人

朝遊訪名山山遠在空翠氛氲亘百里日入行始至杖  
策尋故人解鞍暫停騎石門殊豁險篁筵轉深邃法侶  
欣相逢清談曉不寐平生慕真隱累日求奇異野老朝

入田山僧暮歸寺松泉多逸響苔壁饒古意谷口聞鐘聲林端識香氣願言投此山身世永相棄

宿業師山房待丁公不至

夕陽度西嶺羣壑倏已暝松月生夜涼風泉滿清聽樵人歸欲盡烟鳥栖初定之子期宿來孤琴候蘿逕

萬山潭作

垂釣坐盤石水清心亦閒魚行潭樹下猿挂島藤間游女昔解佩傳聞於此山求之不可得沿月棹歌還

洗然弟竹亭

吾與二三子平生結交深俱懷鴻鵠志昔有鵲鴝心逸  
氣假豪翰清風在竹林遠是酒中趣琴上偶然音

自潯陽泛舟經明海

大江分九流淼淼成水鄉舟子乘利涉往來至潯陽因  
之汎五湖流浪經三湘觀濤壯枚發弔屈痛沈湘魏闕  
心恒在金門詔不忘遙憐上林鴈冰泮也回翔

高陽池送朱二

當昔襄陽雄盛時山公常醉習家池池邊釣女日相隨  
妝成照影競來窺澄波澹澹芙蓉發綠岬毵毵楊柳垂  
一朝物變人亦非四面荒涼人徑稀意氣豪華何處在  
空餘草露濕羅衣此地朝來餞行者翻向此中收征馬  
征馬分飛日漸斜見此空為人所嗟殷勤為訪桃源路  
余亦歸來松子家

送王七尉松滋得陽臺雲

君不見巫山神女作行雲霏紅踏翠曉氛氲嬋娟流入

楚王夢倏忽還隨零雨分空中飛去復飛來朝朝暮暮  
下陽臺愁君此去為仙尉更逐行雲去不迴

夜歸鹿門歌

山寺鳴鐘晝已昏漁陽渡頭爭渡喧人隨沙路向江村  
余亦乘舟歸鹿門鹿門月照開烟樹忽到龐公栖隱處  
巖扉松徑長寂寥惟有幽人夜來去

長樂宮

秦城舊來稱窈窕漢家更衣應不少紅粉邀君在何處



青樓苦夜長難曉長樂宮中鐘暗來可憐歌舞慣相催  
歡娛此事今寂寞惟有年年陵樹哀

和張明府登鹿門作

忽示登高作能寬旅寓情絃歌既多暇山水思微清草  
得風光動虹因雨氣成謬承巴里和非敢應同聲

望洞庭湖贈張丞相

八月湖水平涵虛混太清氣蒸雲夢澤波撼岳陽城欲  
濟無舟楫端居恥聖明坐觀垂釣者空有羨魚情

九日龍沙作寄劉大眷虛

龍沙豫章北九日挂帆過風俗因時見湖山發興多客  
中誰送酒棹裏自成歌歌竟乘流去滔滔任夕波

洞庭湖寄閻九

洞庭秋正濶余欲泛歸船莫辨荆吳地惟餘水共天渺  
瀰江樹沒合沓海潮連遲爾為舟楫相將濟巨川

秦中感秋寄遠上人

一丘常欲卧三徑苦無資北土非吾願東林懷我師黃

金然挂盡壯志逐年衰日夕涼風至聞蟬但益悲

宿永嘉江寄山陰崔少府國輔

我行窮水國君使入京華相去日千里孤帆天一涯卧  
聞海潮至起視江月斜借問同舟客何時到永嘉

上巳洛中寄王九迥

卜洛成周地浮杯上巳筵鬪雞寒食下走馬洛堂前垂  
柳金堤合平沙翠幙連不知王逸少何處會羣賢

夜泊廬江聞故人在東寺以詩寄之

江路經廬阜松門入虎谿聞君尋寂樂清夜宿招提石  
鏡山精怯禪枝怖鷁栖一燈如悟道為照客心迷

宿桐廬江寄廣陵舊遊

山暝聞猿愁滄江急夜流風鳴兩岼葉月照一孤舟建  
德非吾土維揚憶舊遊還將兩行淚遙寄海西頭

行至汝墳寄盧徵君

行乏憩余駕依然見汝墳洛川方罷雪嵩嶂有殘雲曳  
曳半空裏明明五色分聊題一時興因寄盧徵君

唐城館中早發寄楊使君

犯霜驅曉駕數里見唐城旅館歸心逼荒村客思盈訪  
人留後信策蹇赴前程欲識離魂斷長空聽雁聲

九日懷襄陽

去國似如昨倏然經杪秋峴山不可見風景令人愁誰  
采籬下菊應閒池上樓宜城多美酒歸與葛彊遊

初出關旅亭夜坐懷王大校書

向夕槐煙起葱蘢池館曛客中無侶坐關外惜離羣燭

至螢光滅荷枯雨滴聞永懷芸閣友寂寞滯揚雲

早寒江上有懷

木落雁南度北風江上寒我家湘水上遙隔楚雲端鄉  
淚客中盡孤帆天際看迷津欲有問平海夕漫漫

閒園懷蘇子

林園雖少事幽獨自多違向夕開簾坐庭陰落景微鳥  
過烟樹宿螢傍水軒飛感念同懷子京華去不歸

送張子容進士舉

夕曛山照滅送客出柴門惆悵野中別殷勤歧路言茂  
林余偃息喬木爾飛翻無使谷風誚須令友道存

留別王侍御維

寂寂竟何待朝朝空自歸欲尋芳草去惜與故人違當  
路誰相假知音世所稀祇應守寂寞還掩故園扉

早春潤州送從弟還鄉

兄弟遊吳國庭闈戀楚關已多新歲感更饒白眉還歸  
泛西江水離筵北固山鄉園欲有贈梅柳著先攀

送元公之鄂渚尋觀主張驂鸞

桃花春水漲之子忽乘流峴下離蛟浦江中問鶴樓贈  
君青竹杖送爾白蘋洲應是神仙子相逢汗漫遊

送王五昆季省覲

公子戀庭闈勞歌涉海涯水乘舟楫去親望老萊歸斜  
日催烏鳥清江照綵衣平生急難意遙仰鵲鴒飛

送盧少府使入秦

楚關望秦國相去千里餘州縣勤王事山河轉使車祖



筵江上列離恨別前書願及芳年賞嬌鶯二月初

送袁十嶺南尋弟

早聞牛渚詠今見鵲鵲心羽翼嗟零落悲鳴別故林蒼  
梧白雲遠空水洞庭深萬里獨飛去南風遲爾音

永嘉別張子容

舊國余歸楚新年子北征挂帆愁海路分手戀朋情日  
夕故園意汀洲春草生何時一杯酒重與季鷹傾

東京留別諸公

吾道昧所適驅車還向東主人開舊館留客醉新豐樹  
繞溫泉綠塵遮晚日紅拂衣從此去高步躡華嵩

送袁太祝尉豫章

何幸遇休明觀光來上京相逢武陵客獨送豫章行隨  
牒牽黃綬離羣會墨卿江南佳麗地山水舊難名

送席大

惜爾懷其實迷邦倦客遊江山歷全楚河洛越成周道  
路疲千里鄉園老一丘知君命不偶同病亦同憂

送賈昇主簿之荆府

奉使推能者勤王不暫間  
觀風隨按察乘騎度荆關  
送別登何處開筵舊峴山  
征軒明日遠空望郢門間

廣陵別薛八

士有不得志栖栖吳楚間  
廣陵相遇罷彭蠡泛舟還  
檣出江中樹波連海上山  
風帆明日遠何處更追攀

同盧明府早秋宴張郎中海亭

側聽絃歌宰文書游夏徒  
故園欣賞竹為邑幸來蘇  
華

省曾聯事仙舟復與俱欲知臨泛久荷露漸成珠

盧明府早秋宴張郎中海園即事得秋字

邑有絃歌宰翔鸞已狎鷗眷言華省舊暫拂海池遊鬱  
島藏深竹前溪對舞樓更聞書即事雲物是新秋

宴榮二山池

甲第開金穴榮期樂自多  
捩嘶支遁馬池養右軍鵞竹  
引攜琴入花邀載酒過山公  
來取醉時唱接離歌

清明日宴梅道士房

林卧愁春盡，開軒覽物華。  
忽逢青鳥使，邀我赤松家。  
金竈初開火，仙桃正落花。  
童顏若可駐，何惜醉流霞。

寒夜張明府宅宴

瑞雪初盈尺，閒宵始半更。  
列筵邀酒伴，刻燭限詩成。  
香炭金鑪煖，嬌絃玉指清。  
醉來方欲卧，不覺曉雞鳴。

與諸子登峴山作

人事有代謝，往來成古今。  
江山留勝跡，我輩復登臨。  
水落魚梁淺，天寒夢澤深。  
羊公碑字在，讀罷淚沾襟。

尋天台山

吾友太乙子餐霞卧赤城欲尋華頂去不憚惡谿名歇  
馬憑雲宿揚帆截海行高高翠微裏遙見石梁橫

同曹三御史泛湖歸越

秋入詩人意巴歌和者稀泛湖同逸旅吟會是思歸白  
簡徒推薦滄洲已拂衣杳冥雲外去誰不羨鴻飛

晚泊潯陽望廬山

挂席幾千里名山都未逢泊舟潯陽郭始見香爐峯嘗

讀遠公傳遠懷塵外蹤東林精舍近日暮坐聞鐘

陪張丞相登嵩陽樓

獨步人何在嵩陽有故樓歲寒問耆舊行縣擁諸侯林  
莽北彌望沮漳東會流客中過知己無復越鄉憂

武陵泛舟

武陵川路狹前棹入花林莫測幽源裏仙家信幾深水  
迴青嶂合雲度綠谿陰坐聽閒猿嘯彌清塵外心

夏日浮舟過陳大水亭

水亭涼氣多閒棹晚來過澗影見松竹潭香聞芰荷野  
童扶醉舞山鳥助酣歌幽賞未云徧烟光奈夕何

遊鳳林寺西嶺

共喜年華好來遊水石間烟容開遠樹春色滿幽山壺  
酒朋情洽琴歌野興閒莫愁歸路暝招月伴人還

秋日陪李侍御渡松滋江

南紀西江濶皇華御史雄截流寧假檝挂席自生風僚  
寀爭攀鷁魚龍亦避驄坐聽白雪唱翻入棹歌中



梅道士水亭

傲吏非凡吏名流即道流  
隱居不可見高論莫能酬  
水接仙源近山藏鬼谷幽  
再來迷處所花下問漁舟

遊景空寺蘭若

龍象經行處山腰度石關  
屢迷青嶂合時愛綠蘿間  
宴息花林下高談竹嶼間  
寥寥隔塵事疑是入雞山

陪李侍御訪聰上人禪居

欣逢柏臺友共謁聰公禪  
石室無人到繩牀見虎眠  
陰

崖常抱雪枯澗為生泉出處雖云異同歡在法筵

宿立公房

支遁初求道深公笑買山何如石巖趣自入戶庭間苔澗春泉滿蘿軒夜月閒能令許玄度吟卧不知還

題大禹寺義公房

義公習禪處結構依空林戶外一峯秀堦前羣壑深夕陽連雨足空翠落庭陰看取蓮花淨應知不染心

題融公蘭若

精舍買金開流泉遠砌迴芟荷薰講席松柏映香臺  
法雨晴飛去天花晝下來談玄殊未已歸騎夕陽催

李少府與楊九再來

弱歲早登龍今來喜再逢如何春月柳猶憶歲寒松  
煙火臨寒食笙歌達曙鐘喧喧鬪雞道行樂羨朋從

尋張五迴夜園作

聞就龐公隱移居近洞湖興來林是竹歸卧谷名愚  
挂席樵風便開軒琴月孤歲寒何用賞霜露故園蕪

裴司士員司戶見尋

府僚能枉駕家醞復新開  
落日池上酌清風松下來  
廚人具雞黍穉子摘楊梅  
誰道山公醉猶能騎馬回

春日喜王九相尋

二月湖水清家家春鳥鳴  
林花掃更落徑草踏還生  
酒伴來相命開樽共解醒  
當杯已入手歌妓莫停聲

李氏園卧疾

我愛陶家趣園林無俗情  
春雷百卉坼寒食四隣清  
伏

枕嗟公幹歸山羨子平年白社客空滯洛陽城

過故人莊

故人具雞黍邀我至田家綠樹村邊合青山郭外斜開  
筵面場圃把酒話桑麻待到重陽日還來就菊花

歲暮歸南山

北闕休上書南山歸敝廬不才明主棄多病故人疎白  
髮催年老青陽逼歲除永懷愁不寐松月夜窓虛

泝江至武昌

家本洞湖上歲時歸思催客心徒欲速江路苦邇迴殘  
凍因風解新正度臘開行看武昌柳髣髴映樓臺

舟中曉望

挂席東南望青山水國遙舳艫爭利涉來往接風潮問  
我今何去天台訪石橋坐看霞色晚疑是赤城標

途中晴

已失巴陵雨猶逢蜀坂泥天開斜景徧山出晚雲低餘  
濕猶霑草殘流尚入谿今宵有明月鄉思遠悽悽

夕次蔡陽館

日暮馬行疾城荒人住稀  
聽歌知近楚投館忽如歸  
魯堰田疇廣章陵氣色微  
明朝拜嘉慶須着老萊衣

他鄉七夕

他鄉逢七夕旅館益羈愁  
不見穿針婦空懷故國樓  
緒風初減熱新月始臨秋  
誰忍窺河漢迢迢問斗牛

夜泊牛渚趨薛八船不及

星羅牛渚夕風退鷁舟遲  
浦溆嘗同宿煙波忽間之  
榜

歌空裏失船火望中疑明發泛潮海茫茫何處期

夜渡湘水

客舟貪利涉閭裏渡湘川露氣聞芳杜歌聲識采蓮  
榜人投岸火漁子宿潭烟行侶時相問潯陽何處邊

赴京途中遇雪

迢遞秦京道蒼茫歲暮天窮陰連晦朔積雪滿山川  
落鴈迷沙渚飢鳥集野田客愁空佇立不見有人煙

途次望鄉



客行愁落日鄉思重相催  
沉在他山外天寒夕鳥來  
雪深迷郢路雲暗失陽臺  
可歎恓惶子高歌誰為媒

永嘉上浦館逢張八子容

逆旅相逢處江村日暮時  
衆山遙對酒孤嶼共題詩  
解宇鄰蛟室人煙接島夷  
鄉園萬餘里失路一相悲

宿武陽即事

川暗夕陽盡孤舟泊岸初  
嶺猿相叫嘯潭嶂似空虛  
就枕滅明燭扣舷聞夜漁  
雞鳴問何處人物是秦餘

渡揚子江

桂櫂中流望京江兩畔明林開揚子驛山出潤州城海  
盡邊陰淨江寒朔吹生更聞楓葉下淅瀝度秋聲

歲除夜會樂城張少府宅

疇昔通家好相知無間然續明催畫燭守歲接長筵舊  
曲梅花唱新正柏酒傳客行隨處樂不見度年年

寒食

閨戶綺窓閑佳人罷縫衣理琴開寶匣就枕臥重幃夜

久燈花落薰籠香氣微錦衾重自煖遮莫曉霜飛

登安陽城樓

縣城南面漢江流江漲開成南雍州才子乘春來騁望  
羣公暇日坐銷憂樓臺晚映青山郭羅綺晴騎綠水洲  
向夕波搖明月動更疑神女弄珠遊

登萬歲樓

萬歲樓頭望故鄉獨令鄉思更茫茫天寒鴈度堪垂淚  
日落猿啼欲斷腸曲引古堤臨凍浦斜分遠岫近枯楊

今朝偶見同袍友却喜家書寄八行

除夜有懷

五更鐘漏欲相催四氣推遷往復迴  
帳裏殘燈纔去焰爐中香氣盡成灰  
漸看春逼芙蓉枕頓覺寒銷竹葉杯  
守歲家家應未卧相思那得夢魂來

春情

青樓曉日珠簾映紅粉春妝寶鏡催  
已厭交歡憐枕席相將遊戲繞池臺  
坐時衣帶縈纖草行即裊裾掃落梅

更道明朝不當作相期共鬪管絃來

西山尋辛諤

漾舟尋水便因訪故人居落日晴川裏誰言獨羨魚石  
潭窺洞徹沙岸歷紆徐竹嶼見垂釣茅齋聞讀書款言  
忘景夕清興屬涼初回也一瓢飲賢哉常晏如

初年樂城館中卧疾懷歸作

異縣天隅僻孤帆海畔過往來鄉信斷留滯客情多臘  
月聞雷震東風感歲和蟄蟲驚戶穴巢鵲眄庭柯徒對

芳樽酒其如伏枕何歸歟理舟楫江海正無波

送朱大入秦

遊人武陵去寶劍直千金分手脫相贈平生一片心

送友人之京

君登青雲去余望青山歸雲山從此別淚濕薜蘿衣

送張郎中遷京

碧谿常共賞朱邸忽遷榮豫有相思意聞君琴上聲

春曉

春眠不覺曉處處聞啼鳥夜來風雨聲花落知多少

揚子津望京口

北固臨京口夷山近海濱江風白浪起愁殺渡頭人

同儲十二洛陽道中作

珠彈繁華子金羈遊俠人酒酣白日暮走馬入紅塵

宿建德江

移舟泊煙渚日暮客愁新野曠天低樹江清月近人

問舟子

向夕問舟子前程復幾多灣頭正堪泊淮裏足風波

送杜十四之江南

荆吳相接水為鄉君去春江正淼茫日暮征帆何處泊  
天涯一望斷人腸

渡浙江問舟中人

潮落江平未有風扁舟共濟與君同時時引領望天末  
何處青山是越中

王昌齡

字少伯  
江寧人



塞下曲

蟬鳴空桑林八月蕭關道出塞入塞寒處處黃蘆草從  
來幽并客皆共塵沙老莫學游俠兒矜誇紫騮好  
飲馬渡秋水水寒風似刀平沙日未沒黯黯見臨洮昔  
日長城戰咸言意氣高黃塵是今古白骨亂蓬蒿

從軍行二首

向夕臨大荒朔風軫歸慮平沙萬里餘飛鳥宿何處虜  
騎獵長原翩翩傍河去邊聲搖白草海氣生黃霧百戰

苦風塵十年履霜露雖投定遠筆未坐將軍樹早知行  
路難悔不理章句

秋草馬蹄輕角弓持弦急去為龍城戰正值胡兵襲軍  
氣橫大荒戰酣日將入長風金鼓動白露鐵衣濕四起  
愁邊聲南庭時佇立斷蓬孤自轉寒鴈飛相及萬里雲  
沙漲平原冰霰澀惟聞漢使還獨向刀環泣

變行路難

向晚橫吹悲風動馬嘶合前驅引旗節千里陣雲西單

于下陰山沙磧空颯颯封侯取一戰豈復念閨閣

古意

桃花四面發桃葉一枝開欲暮黃鸝轉傷心玉鏡臺清  
箏向明月半夜春風來

越女

越女作桂舟還將桂為楫湖上水渺漫清江不可涉摘  
取芙蓉花莫摘芙蓉葉將歸問夫婿顏色何如妾

聽彈風入松闌贈楊補闕

商風入我絃夜竹深有露絃悲與林寂清景不可度寥  
落幽居心颼颼青松樹松風吹草白谿水寒日暮聲意  
去復還九變待一顧空山多雨雪獨立君始悟

緱氏尉沈興宗置酒南谿留贈

林色與谿古深篁引幽翠山樽在漁舟棹月情已醉始  
窮清源口壑絕人境異春泉滴空崖萌卉坼陰地久之  
風榛寂遠聞樵聲至海鴈時獨飛永然滄洲意古時青  
冥客滅跡淪一尉吾子躊躇心豈其紛埃事緱峰信所

尅濟北餘乃遂齊物意已會息肩理猶未卷舒形性表  
脫畧賢哲議仲月期角巾飯僧嵩陽寺

次汝中寄河南陳贊府

汝山方聯延伊水纔明滅遙見入楚雲又此空館月紛  
然馳夢想不謂遠離別京邑多歡娛衡湘暫沿越明湖  
春草徧秋桂白花發豈惟長思君日夕在魏闕

同從弟銷南齋翫月憶山陰崔少府

高卧南齋時開帷月初吐清輝淡水木演漾在窓戶苒

苒幾盈虛澄澄變今古美人清江畔是夜越吟苦千里  
其如何微風吹蘭杜

代扶風主人答

殺氣凝不流風悲日彩寒浮埃起四遠遊子彌不歡依  
然宿扶風沽酒聊自寬寸心亦未理長缺誰能彈主人  
就我飲對我還慨歎便泣數行淚因歌行路難十五役  
邊地三回討樓蘭連年不解甲積日無所餐將軍降匈  
奴國使沒桑乾去年三十萬獨自還長安不信沙場苦

君看刀箭瘢鄉親悉零落冢墓亦摧殘仰攀青松枝慟  
絕傷心肝禽獸悲不去路傍誰忍看幸逢休明代寰宇  
靜波瀾老馬思伏捩長鳴力已殫少年與運會何事發  
悲端天子初封禪賢良刷羽翰三邊悉如此否泰亦須  
觀

酬鴻臚裴主簿雨後北樓見贈

暮霞照新晴歸雲猶相逐有懷晨昏暇想見登眺目問  
禮侍彤檐題詩訪茅屋高樓多古今陳事滿陵谷地久

微子封臺餘孝王築徘徊顧霄漢豁達俯川陸遠水對  
孤城長天向喬木公門何清靜列戟森已肅不歎攜手  
稀常思着鞭速終當拂羽翰輕舉隨鴻鵠

東京府縣諸公與綦毋潛李頎相送至白馬寺

宿

鞍馬上東門徘徊入孤舟賢豪相追送即棹千里流遠  
峰落日在空波微煙收薄宦忘機括醉來復淹留月明  
見古寺林外登高樓南風開長廊夏夜如涼秋江月照



吳縣西歸夢中遊

送東林廬上人歸廬山

石谿流已亂苔徑入漸微日暮東林下山僧還獨歸昔  
為廬峰意況與遠公違道性深寂寞世情多是非會尋  
名山去豈復望清輝

別劉諶

天地寒更雨蒼茫楚城陰一樽廣陵酒十載衡陽心倚  
伏不可料悲歡豈易尋相逢成遠別後會何如今身在

江海上雲連京國深行當務功業策馬何駸駸

巴陵別劉處士

劉生隱岳陽心遠洞庭水偃帆入山郭一宿楚雲裏竹  
映秋館深月寒江風起煙波桂陽接日夕數千里嫋嫋  
清夜猿孤舟坐如此湘中有來鴈雨雪候音旨

宿裴氏山莊

蒼蒼竹林暮吾亦知所投靜坐山齋月清谿聞遠流西  
峰下微雨向曉白雲收遂解塵中組終南春可遊

秋興

日暮西北堂涼風洗修木著書在南窓門館常肅肅苔  
草延古意視聽轉幽獨或問余所營刈黍就寒谷

齋心

女蘿覆石壁谿水幽蒙朧紫葛蔓黃花娟娟寒露中朝  
飲花上露夜卧松下風雲英化為水光采與我同日月  
蕩精魄寥寥天府空

諸官遊招隱寺

山館人已空青蘿換風雨自從永明世月向龍宮吐鑿  
井長幽泉白雲今如古應真坐松柏錫杖挂窓戶口云  
七十餘能救諸有苦回指巖樹花如聞道場鼓金色身  
壞滅真如性無主僚友同一心清光誰遣取

灞上閒居

鴻都有歸客偃卧滋陽村軒冕無枉顧清川照我門空  
林網夕陽寒鳥赴荒園廓落時得意懷哉莫與言庭前  
有孤鶴欲啄常翩翻為我銜素書弔彼顏與原二君既

不朽所以慰其魂

江上聞笛

橫笛怨江月扁舟何處尋聲長楚山外曲遶胡關深相  
去萬餘里遙傳此夜心寥寥浦溆寒響盡惟幽林不知  
誰家子復奏邯鄲音水客皆擁棹空霜遂盈襟羸馬望  
北走遷人悲越吟何當邊草白旌節隴城陰

太湖秋夕

水宿煙雨寒洞庭霜落微月明移舟去夜靜魂夢歸暗

覺海風度蕭蕭聞鴈飛

過華陰

雲起太華山雲山互明滅東峰始含景了了見松雪羈  
人感幽棲宵映轉奇絕欣然忘所疲永望吟不輟信宿  
百餘里出關玩新月何意昨來心遇物遂遷別人生屢  
如此何以肆愉悅

九江口作

潏潏江勢濶雨開潯陽秋驛門是高岬望盡黃蘆洲水

與五谿合心期萬里遊明時無棄才謫去隨孤舟鷺鳥  
立寒木丈夫佩吳鉤何當報君恩却繫單于頭

大梁途中作

怏怏步長道客行渺無端郊原欲下雪天地稜稜寒當  
時每酣醉不覺行路難今日無酒錢悽惶向誰歎

途中作

遊人愁歲晏早起遵王畿墜葉吹未曉疎林月微微驚  
禽棲不定寒獸相因依歎此霜露下復聞鴻鴈飛渺然

江南意惜與中途違羈旅悲壯髮別離念征衣永圖豈  
勞止明節期所歸寧厭楚山曲無人長掩扉

山行入涇州

睠此山路長停驂問賓御林巒信回惑白日落何處徒  
倚望長風滔滔引歸慮微雨隨雲收濛濛傍山去西臨  
有邊邑北走盡亭戍涇水橫白煙州城隱寒樹所嗟異  
風俗已自少情趣豈伊戀懷土解物且欣遇

琴



孤桐秘虛鳴，朴素傳幽真。  
髣髴絃指外，遂見初古人。  
意遠風雪苦，時來江山春。  
高宴未終曲，誰能辨經綸。

筓篴引

盧谿郡南夜泊舟，夜聞兩岸羌戎謳。  
其時月黑猿啾啾，微雨霑衣令人愁。  
有一遷客登高樓，不言不寐彈筓篴。  
彈作薊門桑葉秋，風沙颯颯青塚頭。  
將軍鐵驄汗血流，深入匈奴戰未休。  
黃旗一點兵馬收，亂殺胡人積如丘。  
瘡病驅來役邊州，仍披漠北羔羊裘。  
顏色飢枯掩面羞。

眼眶淚滴深兩眸思還本鄉食羴牛欲語不得指咽喉  
或有強壯能咿嚶意說被他邊將讎五世屬藩漢主留  
碧毛氊帳河曲遊橐駝五萬部落稠敕賜飛鳳金兜鍪  
為君百戰如過籌靜掃陰山無鳥投家藏鐵券特承優  
黃金千斤不稱求九族分離作楚囚深谿寂寞絃苦幽  
草木悲感聲颼颼僕本東山為國憂明光殿前論九疇  
麓讀兵書盡冥搜為君掌上施權謀洞曉山川無與儔  
紇宸詔發遠懷柔揺筆飛霜如奪鉤鬼神不得知其由

憐愛蒼生比蚍蜉朔河屯兵須漸抽盡遣降來拜御溝  
便令海內休戈矛何用班超定遠侯史臣書之得已不

烏栖曲

白馬逐朱車黃昏入狹斜柳樹烏爭宿爭枝未得飛上  
屋東房少婦壻從軍每聽烏啼知夜分

城傍曲

秋風鳴桑條草白狐兔驕邯鄲飲來酒未消城北原平  
掣阜鵬射殺空營兩騰虎迴身却月佩弓消

行路難

雙絲作縷繫銀鉸百尺寒泉轆轤上懸絲一絕不可望  
似妾傾心在君掌人生意氣好還捐只重狂花不重賢  
宴罷調箏奏離鶴迴嬌轉盼泣君前君不見眼前事豈  
保須臾心勿異西山日下雨足稀側有浮雲無所寄但  
願莫忘前者言剉骨黃塵亦無愧行路難勸君酒莫辭  
煩美酒千鐘猶可盡心中片愧何可論一聞漢主思故  
劍使妾常嗟萬古魂

駕幸河東

晉水千廬合汾橋萬國從  
開唐天業盛入沛聖恩濃  
下輦迴三象題碑任六龍  
睿明懸日月千載此時逢

胡笳曲

城南虜已合一夜幾重圍  
自有金笳引能霑出塞衣  
聽臨關月苦清入海風微  
三奏高樓曉胡人掩涕歸

潞府客亭寄崔鳳童

蕭條郡城閉旅館空寒煙  
秋月對愁客山鐘搖暮天  
新

知偶相訪斗酒情依然一宿阻長會清風徒滿川

和振上人秋夜懷士會

白露傷草木山風吹夜寒遙林夢親友高興發雲端郭  
外秋聲急城邊月色殘瑤琴多遠思更為客中彈

送李擢遊江東

清洛日夜漲微風引孤舟離腸便千里遠夢生江樓楚  
國橙橘暗吳門煙雨愁東南具今古歸望山雲秋

客廣陵

樓頭廣陵近九月在南徐秋色明海縣寒煙生里閭夜  
帆歸楚客昨日度江書為問易名叟垂綸不見魚

靜法師東齋

築室在人境遂得真隱情春盡草木變雨來池館清琴  
書全雅道視聽已無生閉戶脫三界白雲自虛盈

宿京江口期劉翫虛不至

霜天起長望殘月生海門風靜夜潮滿城高寒氣昏故  
人何寂寞久已乖清言明發不能寐徒盈江上樽

九日登高

青山遠近帶皇州  
霽景重陽上北樓  
雨歇亭臯仙菊潤  
霜飛天苑御梨秋  
茱萸插鬢花宜壽  
翡翠橫釵舞作愁  
謾說陶潛籬下醉  
何曾得見此風流

東谿翫月

月從斷山口遙吐  
柴門端萬木分空  
霽流陰中夜攢光  
連虛象白氣與風  
露寒谷靜秋泉響  
巖深青靄殘澄清  
入幽夢破影抱空  
巒恍惚琴窓裏松  
谿曉思難



送歐陽會稽之任

懷祿貴心賞東流水長官移會稽郡地邇上虞鄉緩  
帶屏紛雜漁舟臨訟堂逶迤迴谿趣整肅飛鳥行萬室  
霽朝雨千峰迎夕陽輝輝遠洲映曖曖澄湖光白髮有  
高士青春期上皇應須枉車騎為我訪荷裳

答武陵田太守

仗劍行千里微軀敢一言曾為大梁客不負信陵恩

題灞池二首

腰鎌欲何之東園刈秋韭世事不復論悲歌和焦叟  
開門望長川薄暮見漁者借問白頭翁垂綸幾年也

擊磬老人

雙峰褐衣久一磬白眉長誰識野人意徒看春草芳

送胡大

荆門不堪別況乃瀟湘秋何處遙望君江邊明月樓

送郭司倉

映門淮水綠留騎主人心明月隨良掾春潮夜夜深

送李十五

怨別秦楚深江中秋雲起天長杳無隔月影在寒水

送張四

楓林已愁暮楚水復堪悲別後冷山月清猿無斷時

武陵田太守席送司馬盧谿

諸侯分楚郡飲餞五谿春山水清暉遠俱憐一逐臣

送譚八之桂林

客心仍在楚江館復臨湘別意猿鳥外天寒挂水長

送劉十五之郡

平明江霧寒客馬江上發扁舟事洛陽  
窅窅含楚月

從軍行四首

烽火城西百尺樓黃昏獨上海風秋更吹羌笛關山月  
無那金閨萬里愁

琵琶起舞換新聲總是關山舊別情撩亂邊愁聽不盡  
高高秋月照長城

青海長雲暗雪山孤城遙望玉門關  
黃沙百戰穿金甲

不破樓蘭終不還

大漠風塵日色昏  
紅旗半掩出轅門  
前軍夜戰洮河北  
已報生擒吐谷渾

出塞二首

秦時明月漢時關  
萬里長征人未還  
但使龍城飛將在  
不教胡馬度陰山

騶馬新跨白玉鞍  
戰罷沙場月色寒  
城頭鐵鼓聲猶振  
匣裏金刀血未乾

采蓮曲二首

吳姬越艷楚王妃，爭弄蓮舟水濕衣。  
來時浦口花迎入，采罷江頭月送歸。

荷葉羅裙一色裁，芙蓉向臉兩邊開。  
亂入池中看不見，聞歌始覺有人來。

春宮曲

昨夜風開露井桃，未央前殿月輪高。  
平陽歌舞新承寵，簾外春寒賜錦袍。

西宮春怨

西宮夜靜百花香  
欲卷珠簾春恨長  
斜抱雲和深見月  
朦朧樹色隱昭陽

西宮秋怨

芙蓉不及美人妝  
水殿風來珠翠香  
誰分含啼掩秋扇  
空懸明月待君王

長信秋詞二首

金井梧桐秋葉黃  
珠簾不捲夜來霜  
熏籠玉枕無顏色

卧聽南宮清漏長

奉帚平明金殿開  
且將團扇暫徘徊  
玉顏不及寒鴉色  
猶帶昭陽日影來

青樓曲二首

白馬金鞍從武皇  
旌旗十萬宿長楊  
樓頭小婦鳴箏坐  
遙見飛塵入建章

馳道揚花滿御溝  
紅妝綬綰上青樓  
金章紫綬千餘騎  
夫婿朝回初拜侯



青樓怨

香幃風動花入樓  
高調鳴箏緩夜愁  
腸斷關山不解說  
依依殘月下簾鉤

浣紗女

錢塘江畔是誰家  
江上女兒全勝花  
吳王在時不得出  
今日公然來浣紗

閨怨

閨中少婦不曾愁  
春日凝妝上翠樓  
忽見陌頭楊柳色

悔教夫壻覓封侯

蕭駙馬宅花燭

青鸞飛入合歡宮  
紫鳳銜花出禁中  
可憐今夜千門裏  
銀漢星回一道通

寄穆侍御出幽州

一從恩譴度瀟湘  
塞北江南萬里長  
莫道薊門書信少  
鴈飛猶得到衡陽

西江寄越弟

南浦逢君嶺外還，沅谿更遠洞庭山。  
堯時恩澤如春雨，夢裏相逢同八關。

李四倉曹宅夜飲

霜天留後故情歡，銀燭金爐夜不寒。  
欲問吳江別來意，青山明月夢中看。

宴春源

源向春城花幾重，江明深翠引諸峰。  
與君醉失松谿路，山館寥寥傳暝鐘。

龍標野宴

沅谿夏晚足涼風  
春酒相攜就竹叢  
莫道絃歌愁遠謫  
青山明月不曾空

聽流人水調子

孤舟微月對楓林  
分付鳴笳與客心  
嶺色千重萬重雨  
斷絃收與淚痕深

梁苑

梁園秋竹古時煙  
城外風悲欲暮天  
萬乘旌旗何處在

平臺賓客有誰憐

題朱鍊師山房

叩齒焚香出世塵  
齋壇鳴磬步虛人  
百花仙醞能留客  
一飯胡麻度幾春

送魏二

醉別江樓摘柚香  
江風引雨入船涼  
憶君遙在瀟湘月  
愁聽清猿夢裏長

別李浦之京

故園今在灞陵西江畔逢君醉不迷小弟隣莊尚漁獵  
一封書寄數行啼

送狄宗亨

秋在水清山暮蟬洛陽樹色鳴皋煙送君歸去愁不盡  
又惜空度涼風天

送薛大赴安陸

津頭雲雨暗湘山遷客離憂楚地顏遙送扁舟安陸郡  
天邊何處穆陵關

芙蓉樓送辛漸

丹陽城南秋海陰  
丹陽城北楚雲深  
高樓送客不能醉  
寂寂寒江明月心

重別李評事

莫道秋江離別難  
舟船明日是長安  
吳姬緩舞留君醉  
隨意青楓白露寒

別陶副使歸南海

南越歸人夢海樓  
廣陵新月海亭秋  
寶刀留贈長相憶

當取戈船萬戶侯

送人歸江夏

寒江綠水楚雲深  
莫道離憂遠  
心曉夕雙帆歸鄂渚  
愁將孤月夢中尋

送李五

玉盃金罍傾送君  
江西日入起黃雲  
扁舟乘月暫來去  
誰道滄浪吳楚分

巴陵送李十二



搖曳巴陵洲渚分清江傳語便風聞山長不見秋城色  
日暮蒹葭空水雲

盧谿主人

武陵谿口駐扁舟谿水隨君向北流行到荆門上三峽  
莫將孤月對猿愁

送朱越

遠別舟中蔣山暮君行舉首燕城路薊門秋月隱黃雲  
期向金陵醉江樹

別辛漸

別館蕭條風雨寒  
扁舟月色渡江看  
酒酣不識關西道  
却望春江雲尚殘

送姚司法歸吳

吳掾留觴楚郡心  
洞庭秋雨海門陰  
但令意遠扁舟近  
不道滄江百丈深

陶翰

潤州人

古塞下曲

進軍飛狐北窮寇勢將變日  
落沙塵昏背河更一戰  
駢馬黃金勒琯弓白羽箭  
射殺左賢王歸奏未央殿  
欲言塞下事天子不召見  
東出咸陽門哀哀淚如霰

燕歌行

請君留楚調聽我吟燕歌  
家在遼水頭邊風意氣多出  
身為漢將正值戎未和雪中  
凌天山水上度交河大小  
百餘戰封侯竟蹉跎歸來灞  
陵下故舊無相過雄劍委  
塵匣空門惟雀羅玉簪還  
趙姝瑤琴付齊娥昔日不為

樂時哉今奈何

望太華贈盧司倉

行吏到西華乃觀三峰壯削成元氣中傑出天河上如  
有飛動色不知青冥狀巨靈安在哉厥跡猶可望方此  
顧行旅未由飭仙裝葱蘢記星壇明滅數雲嶂良友垂  
真契宿心所微尚敢投歸山吟霞徑一相訪

贈鄭員外

驄馬拂繡裳按兵遼水陽西分鴈門騎北逐樓煩王聞

道五軍集相邀百戰場風沙暗天起虜騎森已行儒服  
揖諸將雄謀吞八荒金門來見謁朱紱生輝光數載侍  
御史稍遷尚書郎人生志氣立所貴功業昌何必守章  
句終年事蒼黃同時獻賦客尚在東陵傍

晚出伊闕寄河南裴中丞

退無偃息資進無當代策冉冉時將暮坐為周南客前  
登關塞門永眺伊城陌長川黯已空千里寒氣白家本  
渭水西異日同所適秉志師禽尚微言祖莊易一辭林

壑間共繫風塵役交朋忽先進天道何紛劇豈念嘉遯  
時依依偶沮溺

送朱大出關

楚客西上書十年不得意平生相知者晚節心各異長  
揖五侯門拂衣謝中貴丈夫多別離各有四方事拔劍  
因高歌蕭蕭北風至故人有斗酒是夜共君醉努力長  
加餐當年莫相棄

宿天竺寺

松栢亂巖口山西微逕通天開一峰見宮闕生虛空正  
殿倚霞壁千樓標石叢夜來猿鳥靜鐘梵寒雲中峰翠  
映湖月泉聲亂谿風心超諸境外了與懸解同明發氣  
候改起視長涯東湖色濃蕩漾海光漸瞳矇葛仙迹尚  
在許氏道猶崇獨往古來事幽懷期二公

南楚懷古

南國久蕪漫我來空鬱陶君看章華宮處處生黃蒿但  
見陵與谷豈知賢與豪精魂托古木寶玉捐江皋倚棹

下晴景迴舟隨晚濤碧雲暮寥落湖上秋天高往事那堪問此心徒自勞獨餘湘水上千載聞離騷

早過臨淮

夜來三渚風晨過臨淮島湖中海氣白城上楚雲早鱗鱗魚浦帆潏潏蘆洲草川路日浩蕩怒馬心如擣且言任倚伏何暇念枯槁范子名屢移蘧公志常保古人去已久此理今難道

乘潮至漁浦作



艤棹乘早潮潮來如風雨樟臺忽已隱界峰莫及覩崩  
騰心為失浩蕩目無主亟懂浪始聞漾漾入魚浦雲景  
共澄霽江山相吞吐偉哉造化工此事從終古流沫誠  
足誠商歌調易苦頗因忠信全客心猶栩栩

秋山夕興

山月松篠下月明山景鮮聊為高秋酌復此清夜絃晤  
語方獲志栖心亦彌年尚言興未逸更理逍遙篇

送金卿歸新羅

奉義朝中國殊恩及遠臣鄉心遙渡海客路再經春落  
日誰同望孤舟獨可親拂波銜木鳥偶宿泣珠人禮樂  
夷風變衣冠漢制新青雲已干呂知汝重來賓

柳陌聽早鶯

忽來枝上囀還似谷中聲乍使香閨靜偏傷遠客情間  
闌難辨處斷續若頻驚玉勒留將久青樓夢不成千門  
候曉發萬井報春生徒有知音賞慚非臯鶴鳴

盧象

字緯卿  
汶水人

贈程秘書

客自岐陽來吐音若鳴鳳孤飛畏不偶獨立誰見用忽  
從被褐中召入承明宮聖人借顏色言事無不通殷勤  
拯黎庶感激論諸公將相猜賈誼圖書歸馬融顧余久  
寂寞一歲麒麟閣且共歌太平勿嗟名宦薄

家叔徵君東谿草堂二首

開山十里餘青壁森相倚欲識堯時天東谿白雲是雷  
聲轉幽壑雲氣香流水澗影生龍蛇巖端翳檉梓大道

終不易君恩曷能已鶴羨無老時龜言攝生理浮年笑  
六甲元化潛一指未暇掃雲梯空慚阮家子

今朝共遊者得性閒未歸已到仙人家莫驚鷗鳥飛水  
深巖子釣松挂巢父衣雲氣轉幽寂谿流無是非名理  
未足羨腥臊詎所希自惟負貞意何歲當食薇

鄉試後自輦遠田家因謝隣友見過之作

雞鳴出東邑馬倦登南巒落日見桑柘翳然丘中寒隣  
家多舊識投暝來相看且問春稅苦兼陳行路難園場

近陰壑草木易凋殘  
峯暗雪猶積澗深冰已團  
浮名知何用歲晏不成歡  
置酒共君飲當歌聊自寬

八月十五日象自江東止田園移莊慶會未幾  
歸沒上小弟幼妹尤悲其別兼賦是詩

謝病始告歸依依入桑梓  
家人皆佇立相候衡門裏  
時輩皆長年成人舊童子上堂  
家慶畢顧與姻親齒論舊  
或餘悲目存且相喜田園轉  
蕪沒但有寒泉水哀柳日  
蕭條秋光清邑里入門乍如  
客休騎非便止中飯顧王

程離憂從此始

雜詩二首

家居五原上征戰是平生獨負山西勇誰當塞下名死  
生遼海戰雨雪薊門行諸將封侯盡論功獨不成

君家御溝上垂柳夾朱門列鼎會中貴鳴珂朝至尊死  
生在片議窮達由一言須識苦寒士莫矜孤白溫

早秋宴張郎中海亭即事

邑有絃歌宰翔鸞狎野鷗眷言華省舊暫滯海池遊鬱

島藏深竹前溪對舞樓更聞書即事雲物是新秋

峽中作

高唐幾百里樹色接陽臺乍見江山霽俄聞風雨來雲  
從三峽起天向數峰開靈境信難見輕舟那可回

竹里館

江南水不閉山澤氣潛通臘月聞山鳥寒崖見蟄蟲柳  
林春半合荻笋亂無叢回首金陵岬依依向北風

永城使風

長風起秋色細雨含落暉夕鳥向林去晚帆相逐飛蟲  
聲出亂草水氣薄行衣一別故鄉道悠悠今始歸

和徐侍郎叢篠詠

中禁夕沈沈幽篁別作林色連雞樹近影落鳳池深為  
重凌霜節能虛應物心年年承雨露長對紫庭陰

駕幸溫泉

傳聞聖主幸新豐清蹕鳴鑾出禁中細草終朝隨步輦  
垂楊幾處繞行宮千官扈從驪山北萬國來朝渭水東



此日小臣徒獻賦漢家誰復重揚雄

送祖詠

田家宜伏臘歲晏子言歸石路雪初下荒村雞共飛東  
原多煙火北澗隱寒暉滿酌野人酒倦聞隣女機胡為  
困樵采幾日罷朝衣

送綦毋潛

夫君不得意本是滄海來高足未云騁虛舟空復迴淮  
南楓葉落灞岸桃花開出處暫為耳沈浮安繫哉如何


天覆物還遣世遺才欲識秦將漢嘗聞王與裴離筵對  
寒食別雨乘春雷會有辟書至荷衣莫漫裁

追涼歷下古城西北隅此地有清泉喬木

謝朓出華省王祥貽佩刀前賢真可慕良病意空勞貞  
悔不自卜遊隨共爾曹未能齊得喪時復誦離騷閒蔭  
七賢地醉餐三士桃蒼苔虞舜井喬木古城壕漁父偏  
相狎堯年不可逃蟬鳴秋雨霽雲白曉山高咫尺傳雙  
鯉吹噓借一毛故人皆得路誰肯念同袍

寄河上段十六

與君相識即相親  
聞道君家住孟津  
為見行舟試借問  
客中時有洛陽人



石倉歷代詩選卷三十七